

## **Inunnut innarluutilinnut najugaqarfissatut neqeroorutit pillugit Namminersorlutik Oqartussat nalunaarutaat nr. 19, 4. november 2019-imeersoq**

Inuit innarluutillit tapersorneqarnissaannut Inatsisartut inatsisaanni §§ 13, imm. 3, 14, imm. 3, 15 aamma 18, imm. 3 malillugit aalajangersarneqarput:

### **Kapitali 1**

#### *Najugaqatigiiffiit*

##### *Pitsaassutsimut malitassat*

§ 1. Inunnut innarluutilinnut najugaqatigiiffimmik pilersitsinermi, najugaqatigiiffiup ataatsimoortumik nalilersorneqareerneratigut pisariaqartinneqartumik pitsaassuseqarnissaa kommunalbestyrelsip qulakkiissavaa.

*Imm. 2.* Najugaqatigiiffiup pitsaassusaa sammeneqartut tulluuttut iluanni nalilersorneqassaaq:

- 1) Najugaqartut ineriartorsinnaanissaannik periarfissaat, namminneq periarfissaqarfiinik atorluaasinnaanermik periarfissaqarnerat, tamannalu aqqutigalugu sapinngisamik annerpaamik nammineersinnaanissaat.
- 2) Najugaqartut ilinniagaqarnissamut, suliffeqarnissamut aamma sammisaqarnissamut periarfissaat.
- 3) Najugaqatigiiffiup sullinniagai, matumani najugaqatigiiffiup sullinniakkaminut neqeroorutaasa imarisai, kiisalu najugaqartut namminneq inuunerminni atukkaminut sunniuteqarsinnaanerat ilanngullugu.
- 4) Najugaqatigiiffiup periaasai angusaalu, matumani perorsaariaatsimut, tarnip pissusaatigut imaluunnit tarnikkut nappaatinut suleriaatsit ilanngullugit.
- 5) Najugaqatigiiffiup aaqqissugaanera aqunneqarneralu.
- 6) Najugaqatigiiffimmi sulisut piginnaasaat.
- 7) Najugaqatigiiffimmut illutatigut sinaakkusiussat, matumani sullinniakkat pisariaqartitaannut kiisalu ulloq najugaqatigiiffiup periaasaanut ikorfartuutaanersut ilanngullugit.

*Imm. 3.* Imm. 2 malillugu pitsaassutissanut malitassat, najugaqatigiiffiup pilersinneqarnissaanik kommunalbestyrelsip aalajangernerani takuneqarsinnaassapput. Najugaqatigiiffinnut ataasiakkaanut pitsaassutsimut malitassat ataasiakkaat qanoq ilillutik piviusunngortinneqassanersut allaaserineqarsimassaaq.

##### *Aaqqissuussineq*

§ 2. Najugaqatigiiffik nammineq najugarisatut isigineqassaaq. Najugaqatigiiffik ima aaqqissuunneqassaaq, najugaqartut tamarmik immikkut nammineq ineqassallutik, inigisarlu sapinngisamik nammineq anartarfeqarlunilu uffarfittaqaassalluni.

*Imm. 2.* Najugaqartut inimik isersimaartarfimmik igaffimmillu atuisinnaassapput.

### *Malittarisassat*

§ 3. Inunnut innarluutilinnut najugaqaqatigiiffik kommunalbestyrelsimit ingerlanneqartoq tulluuttunik imaqartumik malittarisassaqaassaaq:

- 1) Aqqata, sumiiffiata siunertaatalu allaganngorlugu paasissutissiissutigineqarnera.
- 2) Sullinniakkat allaaserineqarnerat.
- 3) Aqutsisut suliaasaasa allaaserineqarnerat.
- 4) Akisussaassutsimut malittarisassat kiisalu inummumut allamut pingajuusutut inissisimasumut qanoq iliorsinnaatitaaneq.
- 5) Missingersuusernermut, naatsorsuusernermut kukkunersuinernullu malittarisassat.
- 6) Malittarisassanik allannguinerlutit ingerlatseriaaseq.

### *Ulluinnarni aqutsineq*

§ 4. Inunnut innarluutilinnut najugaqaqatigiiffimmi 1-imi arlalinniluunniit aqutsisoq kommunalbestyrelsip atorfinitsittassavaa soraarsittassallugulu.

*Imm. 2.* Najugaqaqatigiiffiup ulluinnarni aqunneqarnera aqutsisup suliaasaraa.

*Imm. 3.* Najugaqaqatigiiffimmi sulisut sinneri inatsisit isumaqatigiissutillu atuuttut malillugit kommunalbestyrelsip atorfinitsittassavai soraarsittarlugillu.

*Imm. 4.* Aqutsisumik sulisunillu atorfinitsitsinermi pinerluuteqarsimannginnermik uppernarsaat piniarneqassaaq. Pisariaqarpallu meeqqamik pinerliisimannginnermik uppernarsaat aamma piniarneqassalluni.

§ 5. Najugaqaqatigiiffik ima ingerlanneqassasoq aqutsisup qulakkiissavaa, najugaqartut taamaalillutik:

- 1) piginnaasat sapinngisallu ulluinnarni inuunerisamik oqinnerulersitsisinnaasut angussallugit, taamatullu iliornikkut ataasiakkaat nammineersinnaalernissamut periarfissaat siuarsarneqassalluni,
- 2) ilaquttanut attaveqatigisartakkanullu attuumassutit attatiinnarsinnaassallugit, aamma
- 3) inuttut ineriartornissamut inooqatigiinnilu sammisaqartitsinerlutit peqataanissamut periarfissaqartitaallutik.

§ 6. Sulisut ataatsimut isigalugit imatut angusaqarsimanissaat aqutsisup qulakkiissavaa:

- 1) naleqquttumik ilinniarsimasuunissaat,
- 2) sullinniakkat pillugit nutaanerpaanik ilisimasaqarnissaat aamma
- 3) sullinniakkat pillugit misilittagaqarnissaat.

§ 7. Najugaqaqatigiiffiup sullinniakkat pisariaqartitaannik ineriartornissamullu periarfissaannik siuarsaasutut aqqissugaasimanissaa aqutsisup qulakkiissavaa.

## **Kapitali 2**

### *Najugaqarfii illersugaasut*

## *Pitsaassutsimut malitassat*

§ 8. Inunnut innarluutilinnut najugaqarfimmik illersugaasumik pilersitsinermi, najugaqarfiup ataatsimoortumik nalilersorneqareerneratigut pisariaqartinneqartumik pitsaassuseqarnissaa kommunalbestyrelsip qulakkiissavaa.

*Imm. 2.* Najugaqarfiup illersugaasup pitsaassusaa sammineqartut tulliuttut iluanni nalilersorneqassaaq:

- 1) Najugaqartut ineriartorsinnaanissaannik periarfissaat, namminneq periarfissaqarfiinik atorluaasinnaanermik periarfissaqarnerat, tamannalu aqutigalugu sapinngisamik annerpaamik nammineersinnaanissaat.
- 2) Najugaqartut ilinniagaqarnissamut, suliffeqarnissamut ingerlataqarnissamulluunniit periarfissaat.
- 3) Najugaqarfiup sullinniagai, matumani najugaqarfiup sullinniakkaminut neqeroorutaasa imarisai, kiisalu najugaqartut namminneq inuunerminni atukkaminut sunniuteqarsinnaanerat ilanngullugu.
- 4) Najugaqarfiup periaasai angusaalu, matumani perorsaariaatsimut, tarnip pissusaatigut imaluunniit tarnikkut nappaatinut suleriaatsit ilanngullugit.
- 5) Najugaqarfiup aqqissugaanera aqunneqarneralu.
- 6) Najugaqarfimmi sulisut piginnaasaat.
- 7) Najugaqarfimmi illutatigut sinaakkusiussat, matumani sullinniakkat pisariaqartitaannut kiisalu ulloq unnuarlu neqeroorutip periaasianut ikorfartuutaanersut ilanngullugit.

*Imm. 3.* Imm. 2 malillugu pitsaassutissanut malitassat, najugaqarfiup pilersinneqarnissaanik kommunalbestyrelsip aalajangernerani takuneqarsinnaassapput. Najugaqarfinnut ataasiakkaanut pitsaassutsimut malitassat ataasiakkaat qanoq ilillutik piviusunngortinneqassanersut allaaserineqarsimassaaq.

## *Aaqqissuussineq*

§ 9. Najugaqarfik nammineq najugarisatut isigineqassaaq. Najugarfik ima aaqqissuunneqassaaq, najugaqartut tamarmik immikkut nammineq ineqassallutik, inigisarlu sapinngisamik nammineq anartarfeqarlunilu uffarfittaqaassalluni.

*Imm. 2.* Najugaqartut inimik isersimaartarfimmik igaffimmillu atuisinnaassapput.

## *Malittarisassat*

§ 10. Inunnut innarluutilinnut najugaqarfik illersugaasoq kommunalbestyrelsimit ingerlanneqartoq tulliuttunik imaqartumik malittarisassaqaassaaq:

- 1) Aqqata, sumiiffiata siunertaatalu allaganngorlugu paasissutissiissutigineqarnera.
- 2) Sullinniakkat allaaserineqarnerat.
- 3) Aqutsisut suliassaasa allaaserineqarnerat.
- 4) Akisussaassutsimut malittarisassat kiisalu inummut allamut pingajuusutut inissisimasumut qanoq iliorsinnaatitaaneq.
- 5) Missingersuuserinermut, naatsorsuuserinermut kukkunersuinernullu malittarisassat.
- 6) Malittarisassanik allannguineranut ingerlatseriaaseq.

## *Ulluinnarni aqutsineq*

**§ 11.** Inunnut innarluutilinnut najugaqarfimmi illersugaasumi 1-imi arlalinniluunniit aqutsisoq kommunalbestyrelsip atorfinitsittassavaa soraarsittassallugulu.

*Imm. 2.* Najugaqarfiup illersugaasup ulluinnarni aqunneqarnera aqutsisup suliassaraa.

*Imm. 3.* Najugaqarfimmi illersugaasumi sulisut sinneri inatsisit isumaqatigiissutillu atuuttut malillugit kommunalbestyrelsip atorfinitsittassavai soraarsittarlugillu.

*Imm. 4.* Aqutsisumik sulisunillu atorfinitsitsinermi pinerluuteqarsimannginnermik uppernarsaat piniarneqassaaq. Pisariaqarpallu meeqqamik pinerliisimannginnermik uppernarsaat aamma piniarneqassalluni.

**§ 12.** Najugaqarfik illersugaasoq ima ingerlanneqassasoq aqutsisup qulakkiissavaa, najugaqartut taamaalillutik:

- 1) piginnaasat sapinngisallu ulluinnarni inuunerisamik oqinnerulersitsisinnaasut angussallugit, taamatullu iliornikkut ataasiakkaat nammineersinnaalernissamut periarfissaat siuarsarneqassalluni,
- 2) ilaqtutanut attaveqatigisartakkanullu attuumassutit attatiinnarsinnaassallugit, aamma
- 3) inuttut ineriartornissamut inooqatigiinnilu sammisaqartitsinernut peqataanissamut periarfissaqartitaallutik.

**§ 13.** Sulisut ataatsimut isigalugit imatut angusaqarsimanissaat aqutsisup qulakkiissavaa:

- 1) naleqquttumik ilinniarsimasuunissaat,
- 2) sullinniakkat pillugit nutaanerpaanik ilisimasaqarnissaat aamma
- 3) sullinniakkat pillugit misilittagaqarnissaat.

**§ 14.** Najugaqarfiup illersugaasup sullinniakkat pisariaqartitaannik ineriartornissamullu periarfissaannik siuarsaasutut aqqissugaasimanissaa aqutsisup qulakkiissavaa.

## **Kapitali 3**

### *Ulloq unnuarlu neqeroorutit*

#### *Ulloq unnuarlu neqeroorummik pilersitsineq*

**§ 15.** Inunnut innarluutilinnut ulloq unnuarlu neqeroorutit Isumaginninnermut Aqutsisoqarfimmit pilersinneqassapput ingerlanneqarlutillu.

#### *Pitsaassutsimut malitassat*

**§ 16.** Inunnut innarluutilinnut ulloq unnuarlu neqeroorummik pilersitsinermi, ulloq unnuarlu neqeroorutip ataatsimoortumik nalilersorneqareernermigut pisariaqartinneqartumik pitsaassuseqarnissaa isumaginninnermut aqutsisoqarfiup qulakkiissavaa.

*Imm. 2.* Najugaqatigiiffiup pitsaassusaa sammineqartut tulliuttut iluanni nalilersorneqassaaq:

- 1) Najugaqartut ineriartorsinnaanissaannik periarfissaat, namminneq periarfissaqarfiinik atorluaasinnaanermik periarfissaqarnerat, tamannalu aqutigalugu sapinngisamik annerpaamik

nammineersinnaanissaat.

- 2) Najugaqartut ilinniagaqarnissamut, suliffeqarnissamut ingerlataqarnissamulluunniit periarfissaat.
- 3) Ulloq unnuarlu neqeroorutip sullinniagai, matumani najugaqarfiup sullinniakkaminut neqeroorutaasa imarisai, kiisalu najugaqartut namminneq inuunerminni atukkaminut sunniuteqarsinnaanerat ilanngullugit.
- 4) Ulloq unnuarlu neqeroorutip periaasai angusaalu, matumani perorsaariaatsimut, tarnip pissusaatigut imaluunniit tarnikkut nappaatinut suleriaatsit ilanngullugit.
- 5) Ulloq unnuarlu neqeroorutip aaqqissugaanera aqunneqarneralu.
- 6) Ulloq unnuarlu neqeroorummi sulisut piginnaasaat.
- 7) Ulloq unnuarlu neqeroorummi illutatigut sinaakkusiussat, matumani sullinniakkat pisariaqartitaannut kiisalu ulloq unnuarlu neqeroorutip periaasianut ikorfartuutaanersut ilanngullugit.

*Imm. 3.* Imm. 2 malillugu pitsaassutissanut malitassat, ulloq unnuarlu neqeroorutip pilersinneqarnissaanik kommunalbestyrelsip aalajangernerani takuneqarsinnaassapput. Najugaqarfinnut ataasiakkaanut pitsaassutsimut malitassat ataasiakkaat qanoq ilillutik piviusunnigortinneqassanersut allaaserineqarsimassaaq.

#### *Aaqqissuussineq*

**§ 17.** Ulloq unnuarlu neqeroorut sapinngisamik ima aaqqissuunneqassaaq, najugaqartut immikkut nammineq ineqassallutik, inigisarlu sapinngisamik nammineq anartarfeqarlunilu uffarfittaqaassalluni.

*Imm. 2.* Najugaqartut inimik isersimaartarfimmik igaffimillu atuisinnaassapput.

**§ 18.** Najugaqartut inaat sapinngisamik najugaqartut suleqatigalugit aaqqissuunneqassaaq aammalu najugaqartut ukiuinut innarluuteqassusaannullu naleqquttunik pequtserneqassalluni.

**§ 19.** Init ataatsimoorfigineqarsinnaasut ima aaqqissuunneqassapput, najugaqartut tamarmik qanorluunniit innarluutaat ikkaluarpata, tamarmik ininik atuisinnaassallutik.

#### *Malittarisassat*

**§ 20.** Inunnut innarluutilinnut ulloq unnuarlu neqeroorut Isumaginninnermut Aqutsisoqarfimmit ingerlanneqartoq malittarisassaqaassaaq, tulliuuttunik imaqartumik:

- 1) Aqqata, sumiiffiata siunertaatalu allaganngorlugu paasisutissiissutigineqarnera.
- 2) Perorsaanermi siunertarineqartut allaaserineqarneri
- 3) Sullinniakkat allaaserinerat.
- 4) Aqutsisut suliassaasa allaaserineqarnerat.
- 5) Akisussaassutsimut malittarisassat kiisalu inummut allamut pingajuusutut inissisimasumut qanoq iliorsinnaatitaaneq.
- 6) Missingersuuserinnermut, naatsorsuuserinnermut kukkunersuinernullu malittarisassat.
- 7) Malittarisassanik allannguinnermut ingerlatseriaaseq.

#### *Ulluinnarni aqutsineq*

**§ 21.** Inunnut innarluutilinnut ulloq unnuarlu neqeroorummi pisortaq Isumaginninnermut Aqutsisoqarfiup atorfinitsittassavaa soraarsittassallugulu.

*Imm. 2.* Ulloq unnuarlu neqeroorutip ulluinnarni aqunneqarnera pisortap suliassaraa.

*Imm. 3.* Pisortap ulloq unnuarlu neqeroorummi sulisut sinneri inatsisit isumaqatigiissutillu atuuttut malillugit atorfinitsittassavai soraarsittarlugillu.

*Imm. 4.* Aqutsisumik sulisunillu atorfinitsitsinermi pinerluuteqarsimannginnermik uppernarsaat piniarneqassaaq. Pisariaqarpallu meeqqamik pinerliisimannginnermik uppernarsaat aamma piniarneqassalluni.

**§ 22.** Ulloq unnuarlu neqeroorut ima ingerlanneqassasoq pisortap qulakkiissavaa, najugaqartut taamaalillutik:

- 1) piginnaasat sapinngisallu ulluinnarni inuunerisamik oqinnerulersitsisinnaasut angussallugit, taamatullu iliornikkut ataasiakkaat nammineersinnaalernissamut periarfissaat siuarsarneqassalluni,
- 2) ilaqtutanut attaveqatigisartakkanullu attuumassutit attatiinnarsinnaassallugit, aamma
- 3) inuttut ineriartornissamut inooqatigiinnilu sammisaqartitsinernut peqataanissamut periarfissaqartitaallutik.

**§ 23.** Sulisut ataatsimut isigalugit imatut angusaqarsimanissaat pisortap qulakkiissavaa:

- 1) naleqquttumik ilinniarsimasuunissaat,
- 2) sullinniakkat pillugit nutaanerpaanik ilisimasaqarnissaat aamma
- 3) sullinniakkat pillugit misilittagaqarnissaat.

**§ 24.** Ulloq unnuarlu neqeroorutip sullinniakkat pisariaqartitaannik ineriartornissamullu periarfissaannik siuarsaasutut aaqqissugaasimanissaa pisortap qulakkiissavaa.

## **Kapitali 4**

### *Atuutilerfia- ikaarsaariarnermilu aalajangersakkat*

**§ 25.** Nalunaarut 1. januar 2020-mi atuutilerpoq.

*Imm. 2.* Peqatigisaanik meeqqanut inuusuttunullu kiisalu inunnut annertuumik innarluutilinnut ulloq unnuarlu paaqqinniffiit pillugit Namminersornerullutik Oqartussat nalunaarutaat nr. 64, 29. december 1994-imeersoq atorunnaarsinneqarpoq.

**§ 26.** Najugaqatigiiffiit 1. januar 2020 sioqqullugu pilersinneqarsimasut, kapitali 1-imi piumasqaatit kingusinnerpaamik 1. januar 2023-mi eqqortissimassavaat.

*Imm. 2.* Najugaqarfiit illersugaasut 1. januar 2020 sioqqullugu pilersinneqarsimasut kapitali 2-mi piumasqaatit kingusinnerpaamik 1. januar 2023-mi eqqortissimassavaat.

*Imm. 3.* Ulloq unnuarlu neqeroorutit 1. januar 2020 sioqqullugu pilersinneqarsimasut kapitali 3-mi piumasqaatit kingusinnerpaamik 1. januar 2023-mi eqqortissimassavaat.

*Imm. 4.* Imm. 1-imi 2-milu piffissaliussat kommunalbestyrelsimit qinnutigineqarpata, Naalackersuisunillu sioqqutsisumik akuersissummik pinikkut, ukiut marluk tikillugit sivitsorneqarsinnaapput.

*Imm. 5.* Naalackersuisut akuersiteqqaarnerisigut piffissaliussaq imm. 3-mi taaneqartoq ukiut 2 tikillugit sivitsorneqarnissaa isumaginninnermut aqutsisoqarfimmit qinnutigineqarsinnaavoq.

*Kalaallit Nunaanni Namminersorlutik Oqartussat, ulloq 4. november 2019*

Martha Abelsen

/

Julie Præst Wilche